LES FIANCES

Blandine Le Sauce

Prinz du CD Veillée avec les Contous du Pays du Mené et de Loudia.

Cé nous cant on a du bié fond, q'on a de la terre pllein nôs cllôz a nen gâter su les routes e q'on ét minouze e ben faot se marier ! Més se marier, c'ét pâs si comode q'ela, spa ?

Alors je dis a la mére :

— Viens-t'en t'assire cantë mai su le couin du let. J'alons un petit caozer. Tu vais, la mére, j'e des galants. Ha, je n'e traez, traez biaos gâs. Y'a le Zidore, y'a le Santiano e le Jan.

Ha, le Zidore, ét un biao gâ. Il ét pâs tout ecregnë, sti-la. Il avet des epaoles come un joû de beûs, eune armouere a gllace! Ha, il etet tout den son bloc, dis don, come tâillë a la hache. Biao gâ. Oui més, dis don, j'e dit a la mére de veni o mai pasqe j'avaes bien du tracas o ela:

- Pasqe tu vais, la mére, le ouézè-la il ét tout le temp ao bistrot. Il bait un coup, i nen bait deûz. N'ét pâs q'ela coûte chier, spa, les bolées de cidr, més tout come, ça ne se fet pâs.
 - Ho, q'i dit la mére, il a bû, i bait, i baira! N'ét pâs un gâ pour tai!

Y'avet core le deûzieme ouézè. Ye n'n avet des vaches la-deden! Des qhus de poulain, ma pôvr, a nen câsser les portes!

- Ha, més ce sacrë ouézè-la, i tet tout le temp ao cafë, dis don. Ha dame, i beuvet pâs, més i tet tout le temp a jouer és cartes. E q'i recomencint la belle... N'ét pâs q'i jouint des sous, més tout come, ma mére, ela ne se fet pâs.
 - Ha, q'i dit la mére, il a jouë, i joue, i joura! N'ét pâs un gâ pour tai!

Je n'n avet core yun, ça tet le Jan.

- La mére, si tu savaes, le Jan, ho la la la la ! I bait pâs. I joue pâs és cartes, ha nenna ! Il ét tout le temp a me prendr den ses bras, a m'embracer ! Ét tout come des chôzes qi ne se font pâs !
- Ha, q'i dit la mére, ma petite, i t'a embracë, i t'embrace core, hé ben sti-la ét un gâ pour tai, pasqe ça li pâssera bien vite!